



Սայաթ Նովա

Խաբար գրնաց բըլբուլի մոդ

Խաբար գրնաց բըլբուլի մոդ. «Վարթը քու գալուն մընում է.
Ճուխկընիրը բացրացիլ է, վըրեն շուռ գալուն մընում է.
Առավուտուց գանգակի պես քաղցըր ձեն տալուն մընում է»:
Բըլբուլն ասաց. «Չիմ կանա գա, պուճպուճես լալուն մընում է»:

Վարթը ասաց. «Իմ բըլբուին ալ պուճպուճեն վո՞ւնց կու խափե,
Թե խիլք ու՛նիս, դարիբ բըլբուլ, է՛լ քու բաղի ճա՛նփեն չափե»:
Քանի գուզե քընած տիղը իր թշնամին կուտը կապե,
Էլի վիրշումը մեյդանը Բոստումի Չալուն մընում է:

Վարթը ասաց. «Խա՛յին բըլբուլ, նալլաթ էտ քու էհտիբարին,
Անց կացավ ապրիլ-մայիսը, մեկ օր չը հարցըրիդ յարին»:
Չէթուդ թե մուրագին հասնին, տե՛ս ի՛նչ արավ քավթար դարին,
Փահրադին քլունգը սըպանից, Շիրին՝ խանջալուն մընում է:

Աշխարումը վարթն է Էլի բըլբուլների սիրեկանը.
Բըլբուլի լիզվով իմ ասում, տե՛ր, պահե վարթի նըմանը.
Աշխարումըս քանի սաղ իս, Սայաթ Նովի գերեզմանը՝
Շահ-Աբասի լալի նըման՝ շահի վրեն գալուն մընում է: